

# **NO KASANO TI AGBALIN A MASIRIB ITI IMATANG TI DIOS**

**Sadino ngarud ti paggapuan ti sirib? ket sadino ti  
ayan ti disso ti pannakaawat? Ket iti tao kinunana,  
Adtoy, ti panagbuteng iti Apo, isu ti sirib; ket ti  
umadayo iti dakes ket pannakaawat.**

**JOB 28:20, 28**





Ti panagbuteng iti Apo isu ti pangrugian ti sirib: addaan iti nasayaat a pannakaawat kadagiti amin a mangtungpal kadagiti bilinna: ti panagdayawna agtalinaed iti agnanayon. PSALM 111:10

Kalpasanna, nakitak a ti sirib ket nalablabes ngem ti kinamaag, no kasano a ti lawag ket nalablabes ngem ti sipnget. ECCLESIASTES 2:13

Ti sirib pabilgenna dagiti masirib a nasursurok ngem sangapulo a mannakabalin nga adda iti ciudad. ECCLESIASTES 7:19

No adda asinoman kadakayo nga agkurang iti sirib, dumawat koma iti Dios, a mangted kadagiti amin a tattao a sipaparabur, ket saan a mangbabalaw; ket maitedto kenkuana. Ngem agdawat koma a buyogen ti pammati, nga awan ti agkullayaw. Ta ti agkullayaw ket mayarig iti dalluyon ti baybay a maiduron iti angin ken maiwaras. Ta saan koma a panunoten dayta a tao nga umawatto iti aniaman a banag manipud iti Apo. Ti doble ti panagpampanunotna a tao ket saan a natalged iti amin a dalanna. JAMES 1:5-8

Siasino ti masirib a tao ken naikkan iti pannakaammo iti tengngayo? ipakitana koma manipud iti nasayaat a panagsasarita dagiti aramidna buyogen ti kinaemma ti kinasirib. Ngem ti sirib nga aggapu iti ngato ket umuna a nadalus, kalpasanna natalna, naalumamay, ken nalaka a matrato, napno iti asi ken nasayaat a bunga, awan panangidumduma, ken awan panaginsisingpet. JAMES 3:13, 17

Ti panagbuteng iti Apo isu ti pangrugian ti pannakaammo, ngem dagiti maag umsienda ti sirib ken pannursuro. PROVERBS 1:7

Naragsak ti tao a makasarak iti sirib, ken ti tao a makagun-od iti pannakaawat. PROVERBS 3:13



Anakko, no awatem dagiti sasaok, ket ilemmengmo dagiti bilinko kenka; Iti kasta, iyallatiwmo ti lapayagmo iti kinasirib, ket iyaplikarmo ti pusom iti pannakaawat; Wen, no agpukkawka iti pannakaammo, ket ipangatom ti timekmo maipaay iti pannakaawat; No sapsapulem a kas iti pirak, ket sapulem a kas kadagiti nailemmeng a gameng; Kalpasanna, maawatanmonto ti panagbuteng iti Apo, ket masarakamto ti pannakaammo iti Dios. Ta ti Apo mangted iti sirib: manipud iti ngiwatna agtaud ti pannakaammo ken pannakaawat. Mangurnong isuna iti nasayaat a sirib maipaay kadagiti nalinteg: isu ket maysa a kabal cadagidiay magmagna a nalinteg. Salsalimetmetanna dagiti dana ti panangukom, ken salimetmetanna ti dalan dagiti sasantona. Kalpasanna, maawatanmonto ti kinalinteg, ken panangukom, ken kinalinteg; wen, tunggal nasayaat a dana. PROVERBS 2:1-9

Mangala iti sirib, makagun-od iti pannakaawat: dimo lipaten; dikay met agkedked kadagiti sasao ti ngiwatko. Dimo baybay-an, ket salaknibannacanto: ayaten isuna, ket salimetmetannacanto. Ti sirib ti kangrunaan a banag; ngarud makagun-odka iti sirib: ket iti isuamin a pannakagun-odmo makagun-odka iti pannakaawat. Itan-okmo isuna, ket itandudonaka: ipadayawnaka, inton arakupem isuna. Mangtedto iti ulom iti arkos ti parabur: maysa a korona ti dayag itednanto kenka. PROVERBS 4:5-9

Ti panagbuteng iti Apo isu ti pangrugian ti sirib, ket ti pannakaammo iti nasantoan isu ti pannakaawat. PROVERBS 9:10

Kasla pagay-ayaman ti maysa a maag ti agaramid iti dakes, ngem ti tao a mannakaawat addaan iti sirib. Ti ngiwat ti nalinteg mangiruar iti sirib, ngem ti narungsot a dila maputedto. PROVERBS 10:23, 31



Inton umay ti kinatangsit, umay ngarud ti bain, ngem adda ti sirib kadagiti napakumbaba. Ti awanan sirib umsienna ti padana a tao, ngem ti tao nga addaan pannakaawat siuulimekna.

PROVERBS 11:2, 12

Ti maysa a tao maidayawto a mayannurot iti kinasiribna, ngem ti addaan iti nakillo a puso maibabainto. PROVERBS 12:8

Babaen laeng iti kinatangsit, umay ti panagsusupiat, ngem iti nasayaat a naibalakad ti sirib. PROVERBS 13:10

Ti kinamaag ket rag-o iti daydiay awanan iti kinasirib, ngem ti tao nga addaan pannakaawat magna a sililinteg. Ti panagbuteng iti Apo isu ti pannursuro ti sirib; ket sakbay ti dayaw adda ti kinapakumbaba. PROVERBS 15:21, 33

Anian a nasaysayaat ti pananggun-od iti sirib ngem iti balitok! ken tapno magun-od ti pannakaawat imbes a pirak!

PROVERBS 16:16

Ti manggun-od iti sirib ayatenna ti bukodna a cararrua: ti mangsalimetmet iti pannakaawat makasarakto iti naimbag.

PROVERBS 19:8

Gatangem ti kinapudno, ket dimo ilako; kasta met ti sirib, ken pannursuro, ken pannakaawat. PROVERBS 23:23

Siasinoman a mangay-ayat iti sirib agrag-o iti amana, ngem ti makikadua kadagiti balangkantis busbosenna ti kinabaknangna.

PROVERBS 29:3

Ti sarukod ken pannubngar mangted iti sirib: ngem ti ubing a nabaybay-an iti bagina ibabainna ti inana. PROVERBS 29:15